

“Lo senti oublià”

pièce de Laurent Viérin

Blantsette : Milena
Maurice : Denis
Pierette: Monica
Calliste : Elio
Noemi : Erica
Filibert : Albert
Paceufeuque: René

Nossan : Laurent
Consuelo : Terence
Dzaque : Xavier
Jussef : Maxime
Sharon : Lydie
Arnold : André

(La scène se ivre dessus eun mayen y menten di bouque. Part la meuseucca et dessus la scène arreuve euna fenna viteia de blanc que vionde dessus lo palque eun dansen. Aweitse lo paesadzo, acoute le tapadzo, s’arite, repres la danse, respire l’air que l’at à l’entor, et a la feun, veun y menten de la scène. L’est Blantsette, euna pavioulla)

Blantsette : (Y peubleuc) Veugnade... veugnade avoui me..
Veugnade vire ci dzen paesadzo catcha pe la nateua et plen de tranquilitou.. Veugnade feie eun voyadzo deun si angle de mondo. Dze si Blantsette, euna petchouda pavioula blantse, que veuquei et voule tranquilla pe le bouque, le senti, le prou et le botset de ci mayen..
(Geste) Se veugnade avoui me, vos accompagno-pi deun la nateua et deun le sensachon que ci mondo fi proui ...

(Part la meuseucca et Blantsette tourne feie eun tor)

Tcheut le dzor me promeuo, voulo.. viondo libra et levetta pe le s-abro et le fleur de cise plan.. Aweitso et acouto tot cenque me vionde a l’entor... et jouisso de ceutta forteuna.. Veugnade eunco vos proui ceutte sensachon.. Queuttade-vos geuddi... et vos fio pi etot cougnitre le dzi que vequeison deun si petchou mayen..que frequenton cise mitcho **(Moutre)**.. et sise post..

(Part la meuseucca - Dessus la scène entre plan plan Maurice que l'est ya a l'ive, l'a la tserrite et la tèila)

Blantsette : Vos fio pi encontri lo mondo que reste cè... **(S'aprotse a Maurice et l'ei vionde à l'entor)** Comprendre lo leur caratéo..cognitre la leur temprà...le leur magneie de feie.. la leur magneie de vivre...et euna partia di le leur émochon.. **(Moutre)** De dzi naturel.. a la bonna... seumplo et a la man... **(Blantsette se trame y menten de la scène et avèitse lo paesadzo)**

Maurice : **(Y peubleuc)** Deh, yet mi eun atra reumbambeia que l'est ya feie de méditachon et aveitchi la leunna eun plen dzor ! Ara l'ei penso me..L'ei tramo le pudze ! Semble scappeie de l'ipetaglie di mat avoui çalla tsemeise di nite!

Blantsette : De dzi comme voue se n'en trouvon pami tan.....

Maurice : ...Et l'est mi arreuveie a se catchi y menten de la souie a me vouachi l'erba, maladetto !

(Blantsette l'est eun contemplachon avoui lo sourie)

Maurice : Ara l'ei la feio passi me la voya de reie **(Pouse la tèila, pren la tserrite et s'aprotse tot todzen)** L'ei coppo la tita!! **(Geste)**

Blantsette : **(Avèitse lo ciel)** De ce la vison di ciel l'est peuia..et cilleia comme l'ive d'euna fontanna.... Eun ciel pese, d'euna couleur comme pocca cou se pou vire ya eun diféen...

Maurice : Et se l'a mi voya de vire le s-iteile... l'ei penso me a l'ei feie fi feie lo tour "astronomico" de la zona !!! **(Terie su la tserrite)** « Guardalunna » !! **(Maurice s'aprotse a Blantsette avoui la tserrite, fi pe la planti mi Blantsette se trame et conteuneie comme se Maurice l'est fiche pas)**

Blantsette : Cè, se pouon proui de sensachon et de s-emochon eunco naturelle.. comme le parfum que se senton..... le tapadzo que s'acouton..et le paesadzo que se veion... De bague pami tan comode a acappi y dzor de voue..

Maurice : Se t'accappo te fio senti me eun dzen tapadzo.. site di fir de la tserrite.. et eunco feunque cite de la bouite di patelle...!!

Blantsette : **(Se beutte eun dzouillon)** Mi tanque a quand pou deui ceutta pice et ceutta tranquillitou, louen di rythme sarvadzo de la sociétéou di dzor de voue ? Pocca ... bien pocca...

Maurice : La pice l'est deueie tanque l'est pas arreuvei ceutta matassa avoui lo « burca » que l'est eun tren de comtempli la « Mecca »!!

Blantsette : **(Se tourne levvi)** Ceutta l'est conta de ci mayen..

(Dessus la scène entre plan plan Pierette) De Maurice et Pierette, que vequeison cè dei todzor, et d'eun senti... lo senti oublia...**(Moutre)** Eun viou senti, y caro de ci plan, que pourte y sondzon de la couta de

Montcourvé, à Dzovensan... et que, pe euna via, l'eie itou oublià... mi que tot pe eun dzor l'est vieun fameux deun tot lo mondo, et que voue l'est tournou a itre frequentou d'an matse de dzi... a cosa d'eun secret, que pourte avoui llui...

(Part la meuseucca, Blantsette fi eunco eun tor de danse et chor. Maurice l'est immobile)

Pierette : Adon Maurice, ite restou fert eundreimeï ?!! Digadza te vei avoui ceutta tserrite, que n'en pappi la poussa de l'ive pe tot lo dzor, don ! A te tourna veui lo loup eunco voue que t'i paralisou de la poueie !

Maurice : **(Y peubleuc)** Deun la via, me n'i avei doe grouse disgrace... Euna l'an 80.. quand l'est-mi passoume pe la tita de mari ci fornet a 4 borne de Pierette. Ouè... passou pe la tita... Dien que si itou coudzei.. atro que bale ! N'ayou beuttoula eun condechon... Si dzor me fiche vieun me la queussa a la place d'alli danchi y palquet a Pollein.. beie çalle 14 mente tanque a pami comprendre ren.. et **(Geste)** resti tchappou y cep ... A ceut'oura sario pas ce a feie lo valet a ceutta possedeie et tchappi de « shampoo » tot lo dzor...

Pierette : Ma resta tchica quei va !! An disgrace ! Qu'avoui me t'a pi renque accapou l'Amereuque. L'est comme avei gagna y lot pe te !! Peatro a ceutt'oura te sarie eunco appeuglia y couteillon de mamma.. **(Imitachon)** « *Et mamma fimme ço.. et mamma steria cen. Mamma cè..mamma li...mamma pe pleisi!!!* ».

Maurice : Appellia y couteillon de mamma!? Me ?

Pierette : Ouè, ou peatro y botteillon de pappa !

Maurice : Penso fran pas ! A ceut'oura sario appellia y couteillon de quaque « top model », te lo garanto ! Avoui dou melon comme ço.. atro que ceutta **(Geste)** que l'est platta comme eun lan d'apon et vuida comme lo pallier d'ifouri. **(Geste)** Et sario dza cap de l'Olivetti ara comme ara!! Te lo dio me. Sario eun manager. N'aiou an carieie devan me! Mi que ano.. coudzei de renonchi a tot,.. et vieun resti su pe ci mayen avoui 4 tchivre... dou modzon.. **(Y peubleuc - Geste)** Et an dzeulenna...

Pierette : Ma sen-lo.. manager de l'Olivetti !! Ti scappou a ten.. apri dou dzor l'est alleie a balon l'Olivetti... et voue te sareie y menten d'eun tseumeun..

Maurice : Creio beun que l'est alleie a balon.. .. fran perque perque si allou ya me.... Ma cenque t'ou n'en comprendre te d'icounomia eundustriella...

Pierette : Ma deui pas de cacouilleie, va! Icounomia.. L'a predjà Bill Gates...

Maurice : Eh ouè.. l'an 80 .. an grousa disgrace....

Pierette : Et senten vei queunta sareie la seconda disgrace de ceutta poua via que te totse feie ce avoui me, apri çalla terribla di noce de l'an 80!??

Maurice : L'atra ? L'atra disgrace te sa beun queunta l'est ! L'est lo senti oubliã! La disgrace l'est accapiteie ci malheureux dzor que lo Sen Peie la-ti pas avei la bonna idou de vieun se promeui fran ce pe lo noutro mayen.. et su pe la couta...(Y peubleuc) Et mi que se promeua su pe lo senti oubliã, outre ce damon ci plan, l'a ti pas eunco avei la bonna idou de euncontri la Sente Vierge su devan lo tsapalleun de Sen Grat!!

Pierette : (Fi lo segne de la creux) Mi cenque te deui ara!! An disgrace?!! L'est pas iteie euna disgrace .. l'est itout eun segne di ciel ! Eun meacclio !

Maurice : Eun meacclio?! Lo vrei meacclio sareie itou se tot pe eun dzor te fiche vigna meutta!! Pay t'areie pami avei la possibilitou de deue de critaondze! Cen ouè sareu itou eun meacclio !

Pierette : Se lo Sen Peie l'a vui la Sente Vierge su pe lo senti, l'est lo desteuun que l'a vouleilo!! Et me creio deun lo desteuun!!

Maurice : Me creio deun le disgrace, atro que desteuun!! Ma dimme te se deijè vire la Sente Vierge fran su cè, dessus le noutre bien!! Et fran su lo senti que passe devan cen de nos.. Vo pouade imagini cenque l'est accapitou comme la noella di senti oubliã l'est ippateise.. et comme si post de tranquillitou l'est vieun dei adon.. !! L'est itou la feun !! Di Paradis.. sen fenei a l'Enfer!!

Pierette : Eheu la, qu'isagerou, ara !! L'Enfer ! Ouè n'a beun tchica de mondo qu'arreuve, tchica de movemen.. mi touteun !

Maurice : Tchica de movemen ?!! N'a de dzor que semble de itre a Lourdes.. yet la gnoula di dzi !! Pire que lo senti de Santiago de Compostelo!! Que te sa pami you te viondi!

Pierette : Tcheut spéon de feie ci senti, qu'eun cou l'eie oubliã, et que voue tourne vivre, pe vire la Sente Vierge.. ou quand mimo pe sentui la signa presence.. De mondo que arreuve a la retsertse d'eun espoir...

Maurice : De dzi que no se pourton renque d'imondicha!

Pierette : ...de mondo que l'a tourna pourtou tchica de via deun ci mayen...

Maurice : ...de trambeulli que san pas you van.. et que no se quetton pas eun pice eun moman...

Pierette : Et pe la deie totta.. (Moutre Maurice) Tsandze tchica a respet de çalla beurta grima que me totse vire tcheut le dzor!!!!

Maurice : L'a predja Brigitte Bardot deh ! Arreuvon de tot lo mondo.. de Caluso...tanque eun California !! Tcheut ya pe la Sente Vierge..

comme se la Sente Vierge siche pay comodo la vire...et magar eunco feunque l'ei beie lo cafi eunsemblo !! Vos dio que n'a de dzor que l'est vieun lo « far west » ci post...

Pierette : Me le trouvo tan seumpateucco certen.. et pi.. pe la deuie totta...pe nos l'est iteie euna fourteua, pas euna disgrace.. Me n'i eunco feunque beuttou tchica a place lo bou di fon.. n'i beuttou ya le 4 vatse que n'ayan, devan que fichan arreuvou no se bloqui lo bou pe lo 27 imo cou.. et n'i iver (**Moutre**) euna petchouda boutecca you vendo de souvenir.. Ci dzen Bazar ! Pay cise que vignon pe vire la Sente Vièrge et l'an pas la fourteua de la euncontri.. (**Terie foua euna petchouda statua de la Sente Vierge**) tournon pas y mitcho le man vouide... (**A Maurice**) Et belle se pourton tchica d'imondicha..no se pourton eunco tchica de tri ! (**Geste**) Te t'i eun sarvadzo et te sepourte ren, ma rapella te que te dei merci eunco te lo senti oublià, perque avoui lo gagnadzo de la bouteucca manteugno tcheut dou.. atro que la pachon y vatse... Avoui çalla, entre le Nas, le veterinero et la Forestale, no sarian dza mort de fan...me, et eunco feunque te, manager de l'Olivetti di migne secotse !!!

Maurice : Ma resta tchica queia ! Et pi sarvadzo ou na. Me ballie maten tot ci mondo et si trimadzo. Me fan renque vieun lo nerveux! Penson de vire la Sente Vierge et de resoudre pay tcheut le probleme.. Pe la mouendra baga que va pas ou que voulon avei, fan que vieun su pe lo senti tchertchi la Sente Vierge ! Comme pensi d'alli a medeuceun ou avoui l'avocat ! Tot l'an fan de critaondze..vequeisson a meulle, senza rille et tot de coursa, n'en fan pas euna de bonna, tante apri penson que se veyon la Sente Vierge tcheut le problème son resolui et le bague van tot comme l'an voya ! Ma deh ! Vo dio que sen pami a post !

Pierette : Et pe la deuie totta pensavo d'arendji eunco lo boutson di gadeun .. que tante avoui la conta de la "Suina" no se les quetton pami vardi, et de feie eun per de "Tsambre d'Hotes".. avoui la "Sauna" et la « beauty farm »!

Maurice : Te la ballio la « beauty farm »! Allen pas eunco pensi de beutti dreumei cise martelet que viondon pi inque, don?!! Apri no se les gaven pami di pià !! Dza l'est tot l'an de viamen ! Da preumi arreuvan renque l'ifouri..quand la nei l'eie ya..et l'iver tournave a itre tot tranquillo.. Mi cit'an, si pas se l'est la crise, mi n'a pami ren que les arrite.... Arreuvon feunque eun plen ivir avoui le pi desot le s-eski a la retsetse d'eun meacclio quand mouen te te lo atten.. Chorton de tcheut post..! De totte le borne, comme le darbon !! Et a totte le s-oure.. Magar te t'i foua tranquillo (**Geste**) achattou a la caquila y menten de la nite.. et te te les vei passi devan a 100 a l'oura comme de feuset que quase te passon dessus.. et de cou l'est dza dzen se te

entron pas deun la tsambra a dreuimeï.. magar fran quand te t'i eun tren a feie lo djouà à la grise !...**(Geste)** Atro que la privacy !!

Pierette : (Ironique) Ouè lo djouà... lo djouà de l'ano a cobli! ...Te!

(Y pebleuc) Me rapello gneunca cenque l'est lo djouà..

Maurice : (Aveitse l'oura) Ah me semblave drolo !! Me manquave, voue, la critaodze de 8 et 15. Comme tcheut le dzor l'a beuttou eun martse lo disque di critaondze... Et l'est que ço ara vat eun devan pe tot lo dzor don..quand attaque.. fenei pami .. l'est comme la "duracell" !!

Pierette : Bon, si cou n'i prou sentui-nen! Tant avoui te yet pas meso de se comprendre.. et pi t'a pami fata de me cè a l'ive.. Me n'en voupi ivri lo Bazar.. perque de c'an poussa commencon pi a arreuvi le preumi clian...

(Pierette se trame et va ivri lo Bazar)

Maurice : L'ei lo ballio me lo djouà de l'ano a cobli !! Lo nite se queutton pas aprochi gneunca pe crapa et apri se lamenton.. A la feun deion pappi cospetti se eun va ya djoui a la pinacola eun difeen! Se vos trouvade euna boutecca fremieie vos comme fiade? Allade n'en tchertchi eun'atra iverta ! L'est pas que vos mouèiade de fan devan la pourta clliouta ! Eh sen pappi gneunca citeun don ?... **(Imitachon)** "*Me rapello gneunca cenque l'est lo djouà..*". Ma resta tchica queia va.. De cou a la place de s'arbeulli comme le s-esquimeis quand no allen dreuimeï, que pe la disarbeulli quase fa attaquì la « circulere » **(Geste)** se beuttiche tchica amodo...l'atro **(Geste)** sareie mouèn lagna et se fareie tchappi tchica mouèn de la paresse.

(Maurice reste rito. Part la meuseucca et dessus la scène arreuve tourna Blantsette)

Blantsette : Veyo de cou l'est accapitou, deun noutra via, de pedre lo senti.. et veyo de cou l'est accapitou de tchertchi de lo retrouvì, ci senti.. ou magar d'avei renque fata, deun certen moman, dessus noutro tseumeun, de tchica de coadzo, d'eun idzo p'alli eun devan, ou ou peua d'eun conseil pe prendre certeigne grouse ou petchoude decision... L'est pay que lo senti oublià l'èie vieun lo post you eun moui de dzi veugnavon pe trovì tchica de reconfort deun le moman difficilo de la via, deun le passadzo delectat a affronti.. ou magar renque tchica de protéchon.. p'alli eu devan deun lo leur tseumeun...

(Blantsette chor et dessus la scène entre an cobla de s-ipou, Calliste et Noemi. Calliste l'at euna carte geografique eun man.

Noemi totta « teriate » a la deri moda, mini-jupa et botte di tallon, viteia de blanc. Maurice reste rito)

Calliste : (Vionde la carte de tcheut couti) : 27 gradi a nord est.. 12 a sud ovest... dereie itre plus ou mouen de ci couti... Veun Noemi.. no derian itre quase arreuvou !!

Noemi : L'eie l'oura Callisto ! Uè, n'en poui pami. **(S'aveitse à l'entor, digouteie)** Mi you t'a pourtoutme ! L'ei son de moutseillon et de llioutar grou comme de tsat ! Que dzese... Me semble de itre pe eun film de « Indiana Jones ». Ti cheur que s'en pas perdui-no ?!

Calliste : Spéo de na Tatina.. Selon le s-endicachon l'ei sen a peu près...

Noemi : Mi comme a peu près ?! Bougro de eun eumplatro! Spéo que te siche eun tren a squersi !.. L'est doe s-òoure que no tseumeuen comme de mat..

Calliste : (Y pebleuc) Son 20 meneite que sen parti di plaçale...

Noemi : N'i jami trouvou long pay.. gneunca lo dzor que n'i fi lo trèjimo pearcing a l'ambeuglie.. Si cou n'a prou! Ara me boudzo pami de cè..**(Se achatte)**

Calliste : (Se beutte eun dzouillon et l'ei beise la man) Scusa me tan Tatina Frittolina Garibaldina tru-là-là, patatina de mon cœur.. Mi resta tranquilla..sen arreuvou...

Noemi: L'est 10 cou que te me deui que s'en arreuvou ! Ma dimme te se deun lo 2010 eun dei treubeulli pay! N'i eun mou y pia, que vos dio pas!!.. Se lo sayou beuttavo pas le mine botte de Christian Dior, avoui 23 centimètre de tallon, pe vieun su pe ci gramo post ! T'aiet deumme que l'eie eun senti comodo !! Et lo meun dzen vitei de Gucci de 6000 euro.. eitsa comme l'est redeui..Et t'i gneunca itou bon a me prendre a cantelet !! T'i fran eu'ours, eitsa !..Eun sarvadzo ! **(L'ei veun lo peutro plen)**

Calliste : Ploa pas Pippina trottolina de me.. eun petchou iffort... que l'ei sen... Et pe lo mou i pia l'ei penso me.. Te fio pi eun dzen massadzo..et se t'a beuttou fous place quaque nerf..tracassa-te pas **(Y peubleuc)** Rolando bounama.. l'a quettoume lo secret.. **(Calliste fi pe s'aprotchi)**

Noemi : (Se trame) Resta-me louen! Tante lo dan l'est fi.. eitsa le meun pouo pia.. son tot conflo.. la mina pedicure et eunco feunke la manicure.. son totte a refeie... **(S'aveitse le man)** N'aiou fi le french esprece pe voue !! Callisto.. ma me dimando, cenque l'est passoute pe la tita de veun no se mari su ce..avoui totte le comoditou que n'aian bas pe eun Veulla...

Calliste : Eh na Coccolina de me, l'est pas la mima baga ! T'ou beutti. Eitsa te a l'entor.. cè sen fenei y Paradis...

Noemi : (S'avèitse à l'entor digouteie) Ouè, y paradis.. penso fran pas que lo Paradis siche pay.. **(Ploe)** Lo paradis pe me l'est eun post plen de luxe, de dzente machine, de bouteuque, de « beauty center » et de discoteque.. cheur pas eun gramo plan avoui dou mitcho dirotcha e 4 plante pereie...

Callisto : Et pi ma petchouda petolla, pe eun cou que nos se marien me et te, faiet beun feie le bague tchica amodo ! Ce l'est eun post que no se pourte pi forteua..tan de fourteua ! **(Y peubleuc)**L'est lo treijimo cou que prouvo.. spéen qu'alliche tot amodo adi ci cou..**(A Noemi)** No fa renque trouvi lo senti oublià, lo senti you lo Sen Peie l'a veui la Sente Vierge.. et lo Tsappaleun de Sen Grat, et te vei pi que eun no se marien devan si Tsappaleun..deun la via no se vappi tot amodo et no restempi eunsemblo tanque a la feun di noutro dzor, me et te, te et me...

Noemi : (Y peubleuc) Tanque a la feun di noutre dzor !! Me veun dza mou renque a l'ei pensi !! Di 6 mariadzo que n'i fi.. lo pi long l'est deuou 16 meis, 7 dzor et 27 meneite.. et me semblave dza de mouère..**(A Calliste)** Et pi adi te pouje feie le bague amodo.. et di mouènte loui eun Elicottero a ci poueun.. pay no arreuvan directement su li sensa treubeulli.. Le bague quand se fan.. se fan amodo.. me si pi euna madama.. don?

Calliste : Mi lo si Pippi de me.. ma petchouda fleur de montagne.. mon petchou bosquet de violette.. mon trésor !! Mi te vei pi que dzen quand no semp su.. me et te.. et le s-ouji comme seul temouen..

Noemi : Ouè ouè.. **(Y peubleuc)** mouèn de temouen n'at de ceutta critaondze que si eun tren a feie.. et miou l'est... Mi teun deur Noemi.. teun deur..belle se te fi dzerse renque lo aveitchi.. pensa a la blita de sous que çalla tardocca de la vielle l'a queuttolei.. et pensa que, eun cou mariou, te l'ei pense pi te a l'ei balli an dzenta poulitou y contcho eun banca..

Calliste : Veun, lo senti derreie itre outre ce y fond de ci plan...

Noemi: (Vei Maurice) Eitsa, Callisto, yet eun monsieur outre ce..fi queitsousa, dimanda a llui lo tseumeun !!

Calliste : L'est vrèi Pippi de me..vou tot de suite..atten me ce !!

Noemi : Ouè.. et you t'ou qu'alliche !!

(Calliste s'aprotse à Maurice, que l'est vioudou et l'a pas veui le dou s-ipou)

Calliste : Scusade Monsieur...

(Maurice se vionde)

Calliste : Scusade monsieur, vouite vos di post ?

(Maurice l'est avoui la tserrite eun man et s'aveitse à l'entor)

Maurice : (Ironique) Qui me ? Na na, me si di Bahamas, mi sayou pas cenque feie, adon si viteime da Valdoten et n'i deut : perque voue preigno pas an tserrite, la teila et lo lan et vou pas ya feie eun tor a l'ive eun moman, pe vire comme l'est ?

Calliste : Ah, scusade.. se vouite di Bahama pas ren adon....

Maurice : Tardoc !! Creio beun que si de ce, resto cè pe ci mayen.. **(Y peubleuc)** Ouè mi de you l'est l'est chortei ci armanac ?! D'eun post you yet la fameusa "sena queurta"..perque l'ei manque pas renque lo dedzou.. mi eunco feunque lo devendro, lo desando et la demendze !!

Calliste : Pleisi me si Calliste de la leunna tendra..

Maurice : Et me si Maurice de la leunna torsa, vat ti bien.

Calliste : Me voudreio renque eun eunformachon...

Maurice : ...et me l'amerio pas itre direndja !! Perque n'i la poussa de l'ive.. et comme deui Rigotta outre li **(Moutre Pierette)**, deueu pappi tot lo dzor, don !? Tramade vos tchica de pi inque...

Calliste : Vouillou renque savei.. me et Noemi no deien alli.....

Maurice : Noemi qui ?

Calliste : Noemi, la chose de me...

Maurice : Calla tsaretta a moteur outre li arbeuillate comme an saquetta de nilon? La chose de vos.. ?

Calliste : Ouè, la chose de me..

Maurice : Et beun.. bien de souè...

Calliste : Merci..

Maurice : De ren... **(Y peubleuc)** Lo queun peut blet deh?

Calliste : Et beun.. me et Noemi sen eun tren d'alli no se mari...

Maurice : Vos se mari ?! Et beun bien de souè dou cou, adon ! Et cenque voulèide de me.. fouriade-vos et allade vos mari, me n'en regarde a me !!

Calliste : Sen eun tren d'alli no se mari su pe lo senti oubli. N'i ditchardja de internet lo parcours, **(Moutre lo papi)** mi vouillou vos dimandi le s-endicachon pe l'ei arreuvi.. perque lafei s'en perduno.. **(Vionde la carte)** Tsertsavo lo nord...

Maurice : (Y peubleuc) Que l'aïet perdu lo nord se veijè beun dza...mi me n'en poui fran ren...

Calliste : Sen vieun pe nos se mari et pe dimandi protechon...a la Sente Vierge...

Maurice : (Y peubleuc) Eun atro que la beucha la tita.. et que pense que pe fi alli bien lo mariadzo baste se mari su pe lo senti et predji avoui la Sente Vièrge.....pay l'ei pense lleu... L'est pas que de cou l'ei veun eun devan de chedre an fenna normala et tchica mouen stavaganta de çalla eumbaleusa.. Na.. pi son disaleie et pi l'ei tchison.. et apri meique « *spéen que alliche tot amodo* »...

Calliste : Sen vieun pe dimandi protechon.. et conseil a la Sente Vierge...

Maurice : Vouei pas fata di conseil de la Sente Vierge.. basto belle me pe cen.. Maurice de Tave Filibert, arpian de Met et seudji de Plonta. Quettade pedre lo mariadzo.. Vo lo dio me que l'est 30 ans que si mariou avoui çalla beutumeusa outre li! **(Moutre)** Rapellade vos que se lo mariadzo fiche fran an baga djeusta.. lo Bondjeu sareie mariousse eunco llui....

Calliste : Ouè mi me si eugnamorou-me de Noemi.... l'est fran pe ço que n'i decidou de me mari..

Maurice : Mi quettade iti l'amour.. avoui tot cenque couton le marque da boul... beuttade eun caro le sous pe d'atro..

Calliste : Me et Noemi sen cougneino dessus Facebook.. vos sèide...

Maurice : Na et voui gnenca lo savei!! Te lo ballio me Facebook...

Calliste : ...et l'est dessus face-book que si eugnamouroume de llieu..

Maurice : (Ironique) Djèique...

Calliste : Sen chortei trei senaa dessus Facebook eunsemblo.. apri dessus Facebook n'en decidou de feie la convivensa.. pay pe vire se la baga fonchonave..

Maurice : La convivensa?

Calliste : La convivensa...

Maurice : ... dessus Facebook ?

Calliste : ...dessus Facebook.. Et apri que n'en fi doe senaa de convivensa et vui que tot ço allave et que no martsavon bien d'accord.. n'en pi decidou de nos se mari...

Maurice : (Ironique) Eh.. creio beun apri doe senaa de convivensa.. dessus Face book.. coudzei de se mari..

Calliste : Que émochon.. pensade que l'a dimandoumelo pe e-mail..

Maurice : (Ironique) Pe e-mail..ma te pensa....

Calliste : Et apri dessus la chat n'en avei le preumi rapport.. la pachon.. vos compreignade..

Maurice : ..le preumi rapport..dessus la chat.. ? Me le preumi rapport n'i aveile su y pallier de padan.. avoui an bala de fen.. cite avoui an selorie.. dessus la chat.. a preu pres la mima baga...

Calliste : .. et apri le preumi rapport eun chat.. l'est pi resteie eun condechon...

Maurice : L'est restei eun condechon dessus la chat ?

Calliste : Ouè...

Maurice : dessus internet ?!!

Calliste : Ouè ...

Maurice : L'est accapitou tchica comme la Sente Vièrge.. **(Y peubleuc)** L'est pe cen que l'ou la euncontri.. pe se feie spleuqui comme son

alleie le bague... **(A Calliste)** Deh "Callisto l'asino mai visto" !!!!! Ma me dimando .. ma la tita l'a eumplei-te renque p'alli coppì le pei avoui lo barbi ?

Calliste : Et pay ara sen ce.. me, lleu.. et le petchou Maykol que deipi nitre d'auton... **(Y peubleuc)** Noemi l'est euna fans de Maykol Jakson.. **(A Maurice)** Que veumpi a s'ajointi y 3 meinou de lleu.. et y 2 de me..

Maurice : .. 3 de la fans.. et dou di matas.... djèique...

Calliste : L'est la fameusa fameuille allardjatte....

Maurice : Djèique.. la fameuille allardjatte... Acoutade Callisto de la leuna tendra.. tsertsade de vos gavi de pi inque.. de tchappi lo senti oublià.. que l'est fran ce deri ceutta brenva.. et fiade vos pami vire.. perque si pi dza stouffie de senti totte ceutte conte don ?

Calliste : Tracassade vos pas.. ara nos allen.. merci monsieur Maurice de la leunna torsa.. vouite itou bien gentilo...

Maurice : Ouè.. ouè.. bien gentilo.. comme te fi a t'amalleuchi avoui eun tavan di genre...

Calliste : Veun Noemi.. n'i accapou lo tseumeun.. Veun Tatina Frittolina Garibaldina tru-là-là...

Noemi : L'eie l'oura...

(Calliste va envers Noemi, la tsardze a cantelet parton su pe lo senti. Chorton et Maurice reste solet)

Maurice : Ouè mi vouèi vu le queun martelet.. Se marion..fan dou ou trei meinou.. magar eunco feunque comme dijan le viou « *trei pinou.. trei meinou..* », apri dou dzor se tot ço va pas.. pas gneun problème.. tsandzon.. Apri fan que feie eun' atro meinou avoui an fenna difeenta.. et se tot ço va a balon... pas de tracas.. se tappon dessus euna noua esperienca.. et se n'a panco prou.. tourna meique tchandji moublo.... et meique tourna foua de meinou.. et eun devan pay.. Apri no trouven drolo se la societou va a ballon et que le meinou san pami you van.. creisson avoui meulle probleme et son plen de vicho.. Et pay.. a 6 ans l'an dza fata di psychologue.. son dza le paen le preumi sonnou... Ah ouè.. cise dou.. mi gneunca se vouliche la Sente Vièrge pou pas les sauvi..

(Part la meuseucca - Dessus la scène arreuvon dou s-ouvri de la « Sentieristica » de la Région avoui peuque et pala)

Maurice : Veien se arreuve a feie quèitsousa pe cise dou trambeullei...

Paceufeuque : (Ballie) Deh.. quant'oura n'en fi Filibert.. l'est ti dza noua ?

Filibert : (Aveitse l'oura) Na Paceufeuque.. malheureusement l'est renque 10 et quart...

Paceufeuque : 10 et quart ? Et peua me semblave dza de sentui lo flou de la polenta, deh.. T'i cheur que t'a pas la moutra rita !?

Filibert : Cheur... cheur..Paceufeuque.. anse, la mina l'est dza feunque eun quart d'oura eun devan... pe feie arreuvi pi vito l'oura de maenda !!

Paceufeuque : Et beun..voue me passe pami deh.. n'i l'estomac que l'est eun moman que borbotte..

Filibert : (S'arrite) Squersa pas, Paceufeuque, don ! Rapella-te que fa todzor acouti le messadzo que lo corp no se mande.. Et se l'estomac borbotte, fa tot de suite ariti pe feie an morduaia.. L'atro dzor n'i sentui a "Pronto salute" que le trei quart di ten lo mondo ballie pas fei y sensachon di corp.. la fan, lo fret..la lagne.. et l'est pe cen qu'apri acapiton le disgrace.. le s-ictus, le crep..et eunco feunque **(Geste)** le paresi... **(Paceufeuque fi le corne)** Et avoui tcheut le dzen post you se pou mouère.. te voudret pas mouère fran dessus lo travaille.. ?

Paceufeuque : Mi prente varda don... fa pas squerchi avoui ceutte bague.. Arita meique tot de suite lo cantchi que l'est l'oura de repousi eun moman.. Dza n'i ren voya de mouère.. et eunco mouen de mouère dessus lo travaille..

Filibert : Et pi.. n'en pas lo ten de mouère cit'an..n'en trop de bague a vire....

Paceufeuque : Ouè.. fran pay.. Me voui fran vire queunta feun fan le gressaen d'ifouri..

Filibert : A qui te lo deui...

Paceufeuque (ballie eun crep de peuc avoui la flemma) : Na.. voue me va fran pas.. sento eunco feunque lo peuc pesan da mat.. bien pi pesan que la couteumma..Te que t'i eunco tchica meudeuceun..saret ti la prechon basa.. ?

Filibert : Ma que prechon basa, Paceufeuque!! Quand lo peuc veun pesan....ço l'est marca que pe voue.. n'en dza prou travailla!

Paceufeuque : Et te pou lo deue fort, don! L'Amministrachon voue pou itre braamente satisfita de nos.. L'est dei 9 ouère que nos l'ei ballien comme de mat ya pe ci senti...

Filibert : Ouè, n'en pas quettou eun moman don..

Paceufeuque : Quand mimo sa-te cenque te dio ? Que l'Amministrachon..avoui tot cen que no ballien.. l'at pa an mia de respet pe no..

Filibert: Cen l'est vrei... derian no se balli an medaglie avoui tot cen que no travaillent.. Et derian no balli de peuc pi levette.. adon no sarian mouèn lagna..et magari.. no travaillerian eunco feunque de pi..

Paceufeuque : Nos ? Avoui l'eunvaliditou que n'en? derian gneunca lo eumplei lo peuc ! **(Y pebleuc)** Me n'i lo 78 pe cen de « silicosi »...et eun soufflo y cœur grou comme eun rivet da 3 cm.. **(geste) !**

Filibert : A qui te lo deui.. me n'i lo 97 pe cent.. **(Fi nom de itre ret)** N'i le doe antse de bouque **(Fi nom de coure tot torse)**

Paceufeuque : Aisto !! Et beun n'ario jami deu, deh.. Ma te sa que se vei fran pas...

Filibert : Ouè.. se vei pas... Creio beun, n'i spendui eun capitale per les feie refeie.. N'i fille feie a Barmasse, l'an passou a la feira de Sen t'Ors.. son totte de noyer.... **(Geste)**

Paceufeuque : Et avoui totte ceutte magagne no se fan rouli tot a pia.. et todzor de foua avoui tcheut ten..

Filibert : Et cenque nos resquen.. a qui te lo queutte ? Deui que n'en jami voulei feie de caseun..peatro.. derian feunque nos balli l'endennitou de resqua avoui cenque no resquen ya pe cise senti.. **(Y pebleuc)** surtout quand n'en beui dou veiro...

Paceufeuque : Et ara que l'est tournou lo loup.. no resquen la via tcheut le dzor... Lo loup s'arite pas gnenca devan la Sente Vierge..don..

Filibert: L'a pas poueie de ren.. l'a dza tchoue an trenteigna de modzon e an ceunquanteigna de feie.. mi dabor fa lo protedji.. l'est a reusqua d'esteunchon..

Paceufeuque: Sen nos que sen a reusqua d'esteunchon.. se nos allen eun devan pay..perque quand l'appi fenei d'attaqui le bitche.. attaque-pi le dzi..

Filibert : N'en cheur pas an via comoda..cen l'est cheur.. Et eun pi, avoui tcheut le senti que n'at pe ceutta Vallou, nos dou n'en eunco feunque avei la disgrace de fallei mantieun ci senti.. avoui tot lo viamen de mondo que l'ei passe !!

Paceufeuque : Ouè.. Fran pay.. No, a la feun n'en dobro travaille !!

Filibert : Ouè... et no derian avei dobra paye.. pappi comme sise que l'an la fourteua de travailli ya pe de senti oubli di Bondjeu..

Paceufeuque : Deh Filibert.. a propou de Bondjeu.. sat-teu cenque te dio ? Que si cou si stufie. **(Plante lo peuc)** Feunque lo Bondjeu apri 6 dzor de travail, lo satchimo dzor l'est repousousse.. et no dou no vouden pas travailli de pi que lo Bondjeu, na ?

Filibert : Squersa pas...

Paceufeuque : Adon meique arrita tot.. que la mateou l'est belle feneia.. an dzenta morduaia.. eun bo lliop.. et te vei pi que s'en-pi repousou et eun plèigna fourma pe tourni y mitcho..

(Paceufeuque et Filibert se achatton pe feie la mordua et di sac terion foua de tot)

Paceufeuque : Te sa euna baga que si todzor dimandoumme Filibert..

Filibert : Na, deui me Paceufeuque....

Paceufeuque : Ma te, te deiche vire eun dzor la Sente Vièrge su pe lo senti, cenque te l’ei dimandeureie ?

Filibert : Ah, dzenta dimanda...et te pense que l’est jami vieun me eun devan eunco a me ? L’est trei s-an que sen dessu ci senti.. et l’est trei s-an que viondo avoui la lista di bague a l’ei dimandi.. **(Terie foua eun folliet)** Beutta cas que no deichan la euncontri.. et que l’ache pas tan de ten, avoui totte le bague que l’at a feie.... fio que l’ei quetti la lista di bague que l’amerio avei.. et bel a post..**(Fi vire lo pappi que l’est lon dou metre)**

Paceufeuque : (Pren la lista) Ouè mi touteun.. ou-te prendre lo post de Berlusconi ? Se te réalise tot ço te veun Président de la Répeubleucca !!! Ma dio, Filibert.. te poussiche l’ei dimandi renque euna baga... queunta sareie ?

Filibert : Eitsa si fran pas ! Avoui tot cenque voudrio... sario pas de queun couti comenchi..

Paceufeuque : Ma te deiche chedre!!

Filibert : Dèicho chedre **(Aveitse lo folliet)** la preumi baga que l’amerio l’ei dimandi.. l’est an patente noua.. perque la vielle la n’i pami! Desando l’an torna fimme soufli...n’i fi 2 et 27 !

Paceufeuque : Eunco bien djouià !

Filibert : ...et l’est lo treijimo cou que soufflo... et ci cou me la ballion pami..

Paceufeuque : Ouè mi son pas de bague a dimandi a la Sente Vièrge ço..an patente noua.. Pe cèn te conveun alli bas per li n’i atseuti eunna..

Filibert : Ah na ?.. et adon.. **(Aveiste lo folliet)** donc.. veien tchica.. adon l’ei dimandereio de predji avoui lanta Jeromeine pe me feie quetti ci dzen toque bas eun pont, le mitcho di fond di bor..et eunco la veugne eun rousi.. perque n’i belle lafei que ci « grattaquei » de Tave de Berte.. arreuve pi a se feie quetti tcheut le bien...pensa que va tcheut le dzor l’ei atseuti le s-orange a la bouteucca... sareie feunque prest a l’ei dreuimeie eunsemblo, belle que lanta Jeromeine l’a 80 ans.. pe se feie quetti quèitsousa.. Mi se l’ei predze la Sente Vierge.. feugeua te se queutte pas tot a me...

Paceufeuque : .. ço l’est dza pi euna baga da Sente Vièrge..

Filibert : et te Paceufeuque.. cenque te l’ei dimandereie?..

Paceufeuque : (Meusatte) Me l’ei dimandereio de itre la fenna de me di mouente pe eun dzor!

Filibert : Comme de itre la fenna de te? I-te mat, ara? I-te pas conten de itre eun ommo?!

Paceufeuque : Djèique que si conten de itre eun ommo.. mi lamerio itre lliieu, belle renque eun petchou moman.. an petchouda meneita.. tan pe savei comme se riste deun la tita d'an dzeuleunna !! Vouï savei comme se riste y couran d'air.. **(Y peubleuc)** La fenna de me l'a la tita tellamente vouïda.. que quand souffle l'oura **(Geste)** dei se toppi le bouigno peatro te sen seubli... comme quand passe lo tren...

Filibert : Ma deui tchica pas de critaondze...

(Deun si moman veïon arreuvi eun a lambo, l'est eun technicien de la Région – Paceufeuque et Filibert se catson)

Paceufeuque : Ouè mi you va si ommo de coursa...semble eun di noutre..

Filibert : **(Y peubleuc)** Me n'i jami veui gneun di noutre alli a lambo pay... surtout eun servicho...

Paceufeuque : Mondjeu me pe eun moman n'i avei pouei que l'eie lo cap servicho...

Filibert : Mi deui pas de critaodze, Paceufeuque..n'a pas de reusqua.. lo cap servicho a ceut'oura l'est panco arreuvou eun ufficho...

Paceufeuque : Ouè mi you va ?..

Filibert : Tramen-nos meique feie la mordua tchica pi outre.. peatro va eunco fenei que no fa balli a meudji eunco a llui..

Paceufeuque: Ouè.. allen meique..

(Filibert et Paceufeuque recouillon la mordua et chorton - Lo technicien va trouvi Pierette)

Nossan : Madama Pierette di Noveilloz ?

Pierette : Ouè, vouei vos fata?

Nossan : Bondzor, si lo géomètre Nossan Tabeusse, **(L'ei ballie eun beulliet da veuseutta)** de l'ufficho sempleufeucachon, ratefeucachon et autorisachon de l'Amministrachon regionala.

Pierette : **(tracachatte)** Mondjeu me.. et cenque l'est ti accapitou? N'i dzo fi queitsousa que va pas ? **(Y peubleuc)** Quand arreuvon di s-ufficho ita meique tranquillo que l'est renque pe feie de verbal, pourti de contravvenchon, de bague a pay ou de beurte noalle...

Nossan : Na na, madama...restade tranquilla.. Si vieun pe euna prateucca a nom de vos.

Pierette : An prateucca a nom de me?

Nossan : Ouè, a peu près 17 meis fi, vouei fi dimanda pe tchandji destinachon a eun tsesou de voutra proprietou y folliet 22, mappale

358, parcelle 2386, deun lo veuladzo de Montcorvé..a Dzovensan, vos resulte ?

Pierette : Mondjeu me.. ara dessus dou pia.. tcheut sise numero..sario pas vos deie... Folliet 22, mappale 358.. parcelle 2386.. La seula dimanda que n'i fi me, l'est la dimanda eun quemewa pe arrendji lo bou di Gadeun outre li pay.. **(Moutre)** mi n'i pami avei de noelle dèi poussa...

Nossan : **(Avèitse dessus lo papi)** Eun effet.. la prateucca l'est çalla..l'est la prateucca 27.682...

Pierette : Ouè mi pensavo que l'aian perduila... dèi pi lo ten...

Nossan : Mi na, madama, l'est pas perduia.. mi fa balli lo ten y s-ufficho de istrui la prateucca...

Pierette : **(Ironique)** Djeique que foula.. fa balli lo ten d'istrui la prateucca..

Nossan : Di s-ufficho de la quemewa, you l'a comencha lo seun iter, eun cou que l'an esprimou le leur avis et ballia totte le leur autorisachon, la voutra prateucca 27.682 l'est passeie y s-ufficho de la Région pe conteuneie lo seun parcours... Da premi a l'ufficho laventse.. apri a cite de compatibilitou ambientala, apri à l'ufficho de "rischio idrogeologico", apri a cite de l'urbanistica, apri a cite de protéchon de la montagne, pe arreuvi a l'ufficho di zone a reusque d'inondachon.. a cite di bitche a resqua d'estinchon... eun passen pe cite di plante a resqua de maladie, eun fien eun petchou tor etot a l'ufficho de protechon di "zone umide", a cite di "zone rodze" et eunco feunque a cite di "zone dzane" , tanque a arreuvi, apri itre allou a la Valutachon d'Eumpatte Ambientale, a l'ufficho seumpleufeucachon, ratefeucachon et autorisachon de l'Amministrachon et a noutro servicho, que dei beutti eunsemblo totte ceutte autorisachon, verifii que sichan totte a post et, pe simplifii le bague, apri eun deri control, esprimi eun avis definitif.. condichonnou ou na, avoui ou senza prescreuchon.. da remandi eun quemewa pe le s-osservachon..et la comunicachon definitiva, eun prevision de la Dia, et apri avei verifica lo paymen de la "Bucalossi"..et le fre d'urbanisachon...

Pierette : Et beun l'a fi eun certo iter la mina poua prateucca 27.600 e subia... deh.. Creio beun que n'i pami avèi de noalle...

Nossan : Et que vouite pas deun lo Parc, madama, peatro no faiet eunco feie si petchou passadzo...

Pierette : **(Ironique)** Mondjeu que bien allou...n'en pas avei fata di s-ufficho di Parc.. Mi me semble que dza sise pouon basti... 12 ufficho, senza conti sise de la quemewa, pe arrendji eun crouè bou di gadeun.. pensade se me faiet refeie le mitcho cenque me totsave affronti ..

Nossan : Eh madama.. vouite deun an zona "sottoposta a vincolo"...

Pierette : Ouè.. mi vincolo ou pas.. me penso que gneunca pe arendji eun mitcho dessus la leunna n'a pas fata de totte ceutte autorisachon..l'ei manque eunco l'autorisachon di Vatican perque lo Sen Peie la vui la Sente Vierge fran su ce, apri sen a post.. Mi scusade la dimanda.. mi eun prateucca la mina autorisachon a queun pouen l'est ? Perque avoui tcheut cise s-ufficho n'i pas comprèi-n'en ren...

Nossan : Madama, vo pouade resti tranquilla.. l'iter l'est quase fenei..

Pierette : **(Ironique)** Se me diade pay si dza pi tranquilla.. Et adon ara...cenque deio feie.. ?..

Nossan : Ren madama, si renque vieun vire lo mitcho eun question...pe prendre doe meuseu et feie doe fotografie, de façon a transmettre a tcheut le s-ufficho le s-eunformachon.. et vos balli l'aoutorisachon a feie la dimanda pe la noua destinachon...

Pierette : Comme la dimanda pe le noua destinachon? Eun atra dimanda.. ?

Nossan : Et ouè, madama Pierette, eun atra dimanda..

Pierette : ... et eun'atra prateucca ?..

Nossan : ... eun atra prateucca... Apri que n'en pi cliousei la 27.682 no fappi ivri la 27.683.. No pouen pas miccli doe prateuque.. peatro le s-ufficho van eun tilt, compregande beun, na ?

Pierette : Si beun eun tren a proui de comprendre...mi scusade l'ignorance.. mi l'eie pas pi comodo feie le doe bague eunsemblo?

Nossan : Eh na... Son doe bague difeente! La preumi dimanda vouei filla pe tchandi destinachon a ci mitcho de voutra proprietou..

(Moutre) mi eun cou que no vos autorisen a queutti la vielle destinachon, apri vos fa beun l'ei balli euna noua destinachon a ci bateumen, e pe la avei, fa feie euna noua dimanda.. fa pas miccli le bague et pas gneunca feie le bague eun prisa.. ..l'est fran quand se fan le bague de prisa que apri se fan le s-erreur..

Pierette : **(Ironique)** Na na.... Vouei reison.. fiade meique pas le bague eun prisa... **(Y peubleuc)** Predzade me pas di malheur... Et beun Maurice pou dreuimeu tranquillo.. passerent eunco eun per de s-an devan de posseu beutti a place lo bou di gadeun pe feie eun per tsambre.. L'eie pi comodo feie comme n'en fi pe la bouteucca.. n'en fi devan.. n'en fi que esenti de feie de grouse dimande.. et l'est itou bien pi comodo.. et a la feun..l'est eunco bien allou.. n'en fi que pay lo « condono »..et bel a post..

Nossan : Bon madama Pierette, me vou prendre doe meuseueu..et feie doe fotografeie.. No se veien pi tard.. tourno pi a l'oura de maenda...

Pierette : **(Y peubleuc)** L'a tchica teria de Monseur, cite...arrevon todzor a l'oura de maenda... **(Y peubleuc)** Me fa mi pensi de feie dobla

polenta voue.. perque quand arreuvon sise di « sopralluoghi »..l'an pas de fon.. l'est miou les tchardji que les emplire..

Nossan : (Y peubleuc) Pay n'en aprofite pi belle pe feie eun petchou tor su pe lo senti veui que n'i marquou « trasferta » .. vou-pi prei eun moman la Sente Vierge.. de cou l'ache voya de me balli eun petchou cou de man avoui la fenna.. Siche bonna a feie an manevra pe la retotchi an mietta...et l'ei feie doe note de correchon..**(Geste)** L'est eun tren a me barqui, deh.. Eun cou l'ei deuia comme de berio.... mi avoui l'eiadzo l'est eu tren a me vieun flappa comme eun coperton.. N'i prouou de la siliconi an mietta avoui lo « Saratoga »**(Geste)** ma n'a pami ren que teun su.. cè fa feie eun restinling complet.. perque tot ço s'ipatte de tcheut couti... et la plastecca baste pami.. bastereie renque tchica la solidifei an mietta... Sente Vièrge ... Sente Vièrge pensa-l'ei te.. fiourni Babette dzenta et deuia comme vouillo me...

(Nossan chor - Deun si moman Maurice tourne de l'ive)

Maurice : You allave si ommo avoui la machina di fotografeie ? N'a mi torna de journaliste ya feie de fotografie y senti... Selon me no derian comenchi a les feie pay...

Pierette : Na na.. l'est eun **(Terie foua lo belliet da veuseutta)** de l'ufficho sempleufeucachon, ratefeucachon et autorisachon de la Région... l'est eun géometre.. ara l'est allou feie doe foto et prendre doe meuseueu..

Maurice : Eun atro que l'an beuttou a meuseui le brenve ?

Pierette : Na, na.. l'est outre feie le fotografie y bou di gadeun..

Maurice : Eun ufficho que va ya feie le fotografie y gadeun ? Et beun sen a post.. Apri sise que conton le machine dessus lo tseumeun et sise que v'an ya meuseui le labie dessu le tet.. no se manquavon eunco sise que van ya feie le fotografeie y gadeun..

Pierette : Mi na..tabeco.. l'est pas ya feie le fotografie y gadeun.. l'est vieun pe la prateucca di bou di gadeun.. you voui feie de tsambre..

Maurice : De tsambre pe beutti dreimei le gadeun.. sen pami a post..

Pierette : De Tsambre d'Hotes.. macaco.. comme te spleucavo ceutta mateun... Queutta pedre.. Et pi tracassate pas.. Maurice, avoui tot l'iter que la prateucca dei eunco feie.. sen panco prest a beutti dreimei de mondo.. conteneien meique a l'ei feie dreuimei le gadeun pe dabon..pe ara.....belle perque la fameusa « suina », la H1 N1, l'a fi mouen de tapadzo de cenque voullian no feie crèie...

(Deun ci moman arreuve Consuelo, eun viados brasilien)

Maurice : A propou de gadeun.. eitsa cite que bo paquet !! Faret 110 kg...

Pierette : Ouè mi que grousa fenna deh....

Maurice : An Fenna !? Ci moublo !? Pierette...atseuta-te eun per de leunette... saret pas an fenna ço.. En galmas di genre..

Pierette : Penso beun ! Perque selon te l'est eun ommo ? Eitsa le queuquen que l'at..

Maurice : Le queuquen baste pay pe se les feie refeie.. et belle qui n'en n'a pas pou se les feie creitre.. feunque te ! Mi ço te lo dio me que, queuqueun ou na, l'est pas an fenna... et l'est pas gneunca eun ommo... ço l'est eun « viados » Pierette... aggiorna te.. l'est la deri di mode.. « *Te chor avoui eun ommo ou avoui an fenna?* » « *Na..me chorto avoui eun "viados"...* » L'est eun euncrouisement entre eun caval et an pavioula..

Pierette : Ma di pas di balade !..Eun "viados" ara.. **(Lo aveitse amodo)** L'est an fenna.. Semble feunque a çalla attrice.. çalla star de Holliwood.. queun nom l'a-ti dza Maurice?

Maurice : Eun attrice ?! Ouè et magar sonne eunco lo flèi deun la Clicca de Sen Marteun ! Ma deui pas critaondze pe pleisi ! Site pi que an'attrice semble a eun caval de eun metre et 80 scappou de quaque ciabot.. que l'est miou pas trop se beutti d'itesunna.. te lo dio me...(geste) peatro te les fi fire llui le s-iteile de Holliwood..

Pierette : Ouè.. çalla attrice.. Woopi Golberg... çalla que l'a fi Ghost..

Maurice : Si pas queun film l'a fi .. mi cenque l'est cheur l'est que se l'a fi eun film ci streumen, l'eie cheur pas eun film pe le meinou ... Pe me ço l'est eun de sise Domenican que viondon pi inque derimente.. et que se te va bien te robbon le fromadzo a la crotta..ou la venendze a la veugne.. et se te va mal te chouèion pe 700 euro...

Pierette : Ma fi pas lo raciste comme la couteumma... comme te vei quatcheun de diféen te pense que siche eun lard ou eun bandit...

Maurice : Penso beun..l'est la sociétou de voue que te fi vieun pay.. eun cou no freman pas gneunca le pourte di mitcho... ara te fa beutti le ferreie feunque y bou di pourçoulleun... peatro te pourton ya tot... Et pas pensi d'ipatti le drap foua defoua.. peatro te robbon feunque le caneçon.. **(Aveitse Consuelo)** Ouè.. ouè..l'est eun domenican.. et eunco feunque beurt comme la fan... **(Pren la tserrite)** Vouèi vos fata de queitsousa ?

Consuelo : Buenas Dias.. Jo soy Consuelo..

Pierette : L'a nom Consuelo, Maurice..

Maurice : Te pense eunco que siche euna fenna?.. avoui la vouèce que l'at pourreie alli feie lo bas a la chorale de Sent'ors.. atro que bale..

Consuelo : Soy de Rio de Janeiro..

Pierette : L'est de Rio de Janeiro Maurice...

Maurice : Deh si pappi criteun.. va bien que t'a itedja le lenve.. mi "Consuelo"... et "Rio de Janeiro" le compreigno eunco me que n'i pas fi le s-icoule ate, don ?

Consuelo : Son de Rio de Janeiro.. dou Brazil..

Maurice (Y peubleuc) Ouè ço outre per li l'est carnaval tot l'an !!!!

Consuelo : Soy venida a qui a trobar el sentier perdudos..a cercar de mirar la Suenta Viergine Maria.. por domandar protechòn..a me.. a esto cuerpo....et al mio pays natal.. **(Avèitse Maurice)** par ritorvar l'armonia caliente.. del fuego dou Brazil !

Maurice : Ah te la ballio me l'armonia caliente et lo fuego dou Brazil.. Te passo dessus lo potadjì se te l'ame lo tsate! Bondjeu.... idza me a trouvi la force per l'ei rontre l'itseunna a ci caval da coursa.. devan que fache de dan. !!

Consuelo (S'aprotse a Maurice) Ehi pupalero.. soy caliente com'el sol de levante...e focosa come el alma de Rio...

Maurice : Deh, teun-te outre, perverteui de l'Amazzonia!! Lo pupalero te lo ballio **(Geste)** deri le bouigno, don..

Consuelo : Donde sta el sentiero perdudos .. soy venida a qui para retrobar la via.. la buena suerte.. para la cura dell'anema ..et para el frio e para el calor del cuerpo ?

Maurice : Deh para frio.. Parafllu!!!! Se te tsertse lo senti te lo fio vire me.. resta meique tranquillo! L'est su de li.. Mi resta louen de me et eunco de la grise.. don ! Et ara meique a galop ya de ce !!

Pierette : Eheu Maurice fi pas lo sarvadzo.. poua lliu.. tsertsa de la comprendre... l'est an fenna que l'est tchica eun crise.. Ouè mi te.. cenque t'ou comprendre.. de bague di fenne..

Maurice : Eun crise.. ? Ma ceutta l'est pire que la crise de « waall street » .. se pou pami recuperi...te lo dio me.. !!!

Pierette : L'est eun poua femalla, que l'a perdui lo tseumeun..et l'est renque eun tren a tchertchi de lo retrouvi... pe retrouvi se mima.. pe retrouvi lo tseumeun de l'ama..

Maurice : Deh, mi entre totte le critaondze que t'a fi deun ta via a-te eunco itedja « psicologia » ?! Si pas se l'est site de l'ama ou site de l'an 40... mi que l'aïet perdu lo tseumeun l'ei allave beun pocca pe lo comprendre.. et eunco feunque dei poua.. mi l'est pe lo retrouvi.. que la baga comence a vieun pi diffecila..

Pierette : Magar l'a decidou de tchandji via.. et de vieun dimandi idzo a la Sente Vièrge.. que eunsensiblo que t'i...

Maurice : Ma que eunsensiblo! Ma dio? Ma totte a me deion accapiti?! Et pi...ma dique idzo a la Sente Vierge ! Dei dimandi l'idzo a quaque meudeuceun di mat, atro qu'a la Sente Vierge.! Feunque lliu

tchapperei eun crep se pe disgrace deiche euncontri an patoille di genre!! Eitsa comme l'est arbeuilla!

Pierette : Ma cenque t'ou comprendre te de moda...

Maurice : Ah et ço sareie la moda ?! Ma me gneunca y carnaval de Sen Marteun n'ario pas lo coadzo de m'arbeuilli pay.. atro qu'a ci de Rio de Janeiro!

Consuelo : Yo soy badante e cucineras a la casa de repueso de San Pedros ..

Maurice : Et travaille eunco feunque a la micro-comunitou de Sen Piere.. sen pami a post..

Pierette : Ouè.. aveitse le viou et l'ei fi da meudji..

Maurice : Et beun spéen de mouère devan de vieun viou adon..se l'est pay... perque dza l'est pas dzen itre catcha y refuge.. mi eunco fenei le meun dzor a peuqui de cocomeri et a me feie brochi l'itseunna de eun pay.. n'i pi ren voya.. Prefero belle alli outre eun "Verpellière"...

Consuelo : No el mio bel e pequenio porcellino.. con migo non vai a tomar cocomeros.. ma te asseguro que tu vai a gustar la banana..

Maurice : Na.. la banana na... à l'idzo.. à l'idzo....

(Part la meuseucca et Consuelo se sopatte totta et part envers Maurice que scappe su pe lo senti.. Chorton tcheut dou)

Pierette : Deh lo noutro l'a accapou qui l'ey beise la crita.. pourrio belle pensi de prendre la Consuelo ce a travailli.. pay l'atro farei pami tan lo polet pi inque.. martsereuie drèt comme eun feuset..

(Maurice tourne entri avoui lo flou queurt)

Maurice : Ouè mi deh.. bien allou que si pas passou desot le piotte de ci meulet.. peatro te me recoulliave avoui lo cicciareun Pierette...

Pierette : Te voulliet proui l'emochon de euna avoui le grou queuqueun.. et beun t'a accapoulla..

Maurice : Site peui que le queuquen... l'aïet eun estomac grou comme an credense.. et « Viados » ou pas... pas renque l'eie an beurta fenna.. l'eie eunco feunque eun beur ommo..Na que pouei.. gneunca lo dzor que si perduime bas eun Veulla n'i pas avei de pouèi di genre... **(Y peubleuc)** Si perduime bas y Pont dessus lo Buthier.. n'i tchappou l'arionda et n'i comencha a viondi a l'entro de ci pont.. lo pont de Brooklin.. mi eun cou tchappou l'envio.. sayou pami bon a chotre.. et n'i viondou pe dou dzor et demie a l'entor.. na que pouèie.. l'est pi arreuvou lo senteucco me recoulli... et me spleuqui comme chotre.. Bien allou...

(Part la meuseucca. Maurice et Pierette se beutton deun an couegne et deun si moman arreuve Dzaque, lo senteucco, avoui la

« fuscaccia » et reste rito y menten de la scene. Entre Blantsette avoui eun livro eun man et l’ei vionde a l’entor. Apri s’arrite)

Blantsette : 2010. Chers citoyen, L’oroscope cineis predze cliier. Apri l’an di Boch blanc a la retsertse d’eun identitou et cite de la fontina rodze a reusca d’epidemie, l’est arreuvou, avoui l’an nouvi, l’an de la marmotta grasa. **(Geste dessus lo ventre)** Apri 5 an de bo sonno et de tranquillitou, 5 ans de silence et bien de repou, y requei d’euna borna de noutra dzenta Vallou.. l’est tourneie avoui no **(Moutre lo senteucco)** la marmotta grasa.... De Quart a Pontboset... de Nus a Montjovet, de Tsateillon a Champorchi, de Pontey tanque a Mordzi, et eunco feunque pe la planna de Verrayes et Sen Deni ... tsaque marmotta s’apreste a tourni... La marmotta l’est presta , l’est eun fourma et l’est lesta.. pe eun’ifouri de pachon.. pe conservi an posechon.. Avoui envio et determinachon... « Vito..Vito.. l’est l’an di s-éléchon !! »

(Blantsette baille lo livro de l’oroscope y senteucco que commence a llire fort. Blantsette se beutte acouti)

Dzaque : Eun ifouri straordinero atten le neissu desot lo segne de la marmotta grasa. Eun ifouri restso d’emochon.. Mi etot eun ifouri de tenchon.. Plen de ruse, de promesse, de difficultou et de contraste... euna lutte entre marmotte.. tanque a la deri gneu.. an guéra terribla, totala.. De bende de marmotte d’eun couti.. de bende de marmotte de l’atro.. an guéra entre marmotte grase et marmotte lardze, marmotte blantse et marmotte rodze, marmotte chourde et marmotte ciotte, marmotte de totte qualetou.. marmotte de tcheut djet..Marmotte meulet, marmotte peut blet.. marmotte eun civet... marmotte a maenda .. marmotte et polenta.... marmotte a beuillardon.. marmotte et canelon.. marmotte a creupegnon.. marmotte a campeuchon.. marmotte su.. marmotte bas.. marmotte pan et lard.. Eun ifouri.. que le neissu desot lo segne de la marmotta grasa.. se rapellon pi pe pousa... **(Y peubleuc)** Eun caseun.. m’atten eun 2010 de ca-seun...

(Filibert reste rito et Blantsette l’ei vionde à l’entor. Apri s’arite et tourne predji)

Blantsette : Mi l’est fran pe ço que la marmotta grasa l’a repousou 5 an.. pe avei le s-energie djeuste pe affronti ceutta bataille..et l’est presta a tot pe ço, eun spéen de resisti, avoui la voya de batailli, et surtout de conservi.. la borna pe l’ivi... et apri ceutta bataille.. totta a gagni.. pe d’atre 5 ans... tourni se repousi..

(Blantsette chor et lo senteucco va envers Maurice et Pierette)

Dzaque : Bondzor Pierette.. bondzor Maurice..

Maurice : Mondjeu me l’ei manquave eunco lo senteucco.....

(Ironique) Et selon vos à queunt’oua arreuve eunco cite.. ? **(Aveitse l’oura)** A l’oura de maenda.. que drolo !!

Pierette : **(A Maurice)** Mi Maurice fi pas lo sarvadzo ... Lo senteucco veun à l’oura de maenda perque l’est lo seul moman de la dzornou you travaille pas... touteun.... **(A Dzaque)** Bondzor monsieur lo senteucco.....

Dzaque : Adon tot amodo ?

Pierette : Ouè tot amodo merci..et vos ?

Dzaque : Ouè.. lamenten no se pas.... Vouite todzor dzenta Pierette vos lo seide...et l’est todzor eun pleisi vos se vire...

Pierette : **(Totta contenta)** Merci vouite gentilo..

Maurice : Ouè gentilo.. toquetta .. lo deui a totte.. et lieu... totta contenta.. monjeu me que foula !!

Pierette : Et beun ? Belle se lo deui a totte dique me n’en freggue.. Avoui me l’est bien gentilo quand mimo... et te, te dereie aprendre an mietta le bonne magneie avoui llui a la place de cospetti, tacalleun.. !

Dzaque : L’est eun pleisi eunco vire te Maurice.. l’est poussa que nos se veien pas...

Maurice : Ouè djeique.. te veun no se trovi renque tsaque 5 ans..

Dzaque : Ouè, t’a beun reison.. l’est que avoui tcheut le s-engadzeumen que n’i l’est pas tan comodo vieun su vo se trovi..

Maurice : **(Ironique)** Ah ouè ? Et a-te fenei le –sengadzeumen ara que t’i arrevou a ten a passi ce nos se trovi ?

Dzaque : **(eumbaracha)** Na l’est renque que si eun tren a alli su y senti ... passavo de cè.. et pay n’i pensou de m’ariti vos salui...

Pierette : Que sayo....

Maurice : **(Ironique)** Ouè.. fran sayo...

Pierette : Mi adon se vouite eun tren d’alli su pe lo senti et vouèi pas trop prisà.. arritade vos meudji maenda ce avoui nos..

Maurice : Mi cen ceutta.. baston pas sise que fan le fotografie y gadeun...eunco cite a maenda..

Dzaque : Na, merci Pierette..bien gentila..mi m’arrito pas. Si tchica de coursa.. si eun tren d’alli mari dou s-ipou su y tsappaleun de Sen Grat..et si dza feunque eun retard.. Mi eun veiro lo beio volontchi...

Maurice : Feugeua te.. Beutta foua la miscela y 2, va.. pay l’ei passe la voya de torni eun atro cou..

Pierette : Maurice.. mi planta la li de feie lo sarvadzo..

Maurice : **(Va prendre a bèie)** Va bien..va bien..mi lo fio renque pe te.. don?..

(Maurice beutte beie a Dzaque)

Maurice : L'ei beutto pappi la miscela y 2.. mi l'ei reufello pi lo trelleise... hi hi hi...

(Dzaque bei eun veiro de veun)

Dzaque : Dei que si ce.. vouillou eunco vos eunviti a eun'inaugurachon que no fien la senaa que veun... **(Terie foua eun belliet)**

Maurice : (Y peubleuc) Voila .. attaque la perioda di s-inaugurachon ci cou... Deh, ara pe euna perioda n'en veiem-pi de toute couleur ya pe le queumeueu.. Fan-pi l'inaugurachon de totta sorta de bague.. de la sarraglie de la pourta de la quemuea.. tanque y cerclo de la bosse de la crotta di s-alpeun... Eun dzor la commemorachon de la brotsetta di boueille.. eun atro la fita di tombeun di ceumeutchio.. et eun atro euncoa, la maenda di grale de la parotse.....

Pierette : Ah oue? L'inaugurachon de cenque ?

Dzaque : No fien l'inaugurachon de la noua metressa de l'icoula!

Maurice : Sen a post! Ci cou eunco feunque l'inaugurachon di metresse..

Dzaque : N'en an metressa que l'est malada quaque meis.. et adon n'en pensou de salui ceutta qu'arreve.. avoui an dzenta fita...

Pierette : An dzenta idou...

Maurice : (Ironique) Ah ouè... fran dzenta...

Dzaque : Bon ci cou me fran alli.. peatro le dou s-ipou me ballio pe diperdui...

Maurice : (Ironique) Ouè.. ouè.. allade meique.. fa pappi reusqui d'arrevi eun retard...

Dzaque : Pay n'en aprofite-pi eto pe feie an bonna preie a la Sente Vierge.. comme 5 ans fi.. vui que l'a pourtou fourteunna lo deri cou....

Pierette : Arevoua monsieur lo senteucco...

Dzaque : Arevoua...mi tracassade vos pas.. tourno pi pasi outre d'ifouri..

Maurice : N'aian pas de doute.. arevoua.. et bon voyadzo...

(Lo senteucco chor)

Maurice : Et beun .. site va fran bien avoui le dou macaco que son su se mari... cenque no se totsere-ti eunco vire pe voue...

(Deun ci moman entron trei meinou, Arnold, Sharon et Jussef que van envers Maurice et Pierette)

Maurice : Oh.. a force de dzi normal.. de meinou...

Pierette : (Les avèitse) Lafei que t'a predja trop vito, Maurice...

Sharon : Oh ragga.. eitsade.. li n'a dou veciot.. dimanden a leur..

Maurice: Deh.. veciot a qui ?

Jussef : **(L'a la sigaretta eun botse)** A te.. reumbambeui..

Arnold : **(L'est eun tren de djoui a la play sation. Levve la tita renque pe predji)** Te l'ei arreuve o deien te feie eun dissen.. ?

Jussef : Queutta pedre.. tante va pas llouen si tipo..passe pas l'fourì.. eistsa l'est dza tot dzano...

Maurice : Deh.. vos lo baillo me tot dzano..ma deh.. ma de you chorton sise trèi disalou !!!

Pierette : Ouè mi son de meinou ou de moustre !!!?

Sharon : Ara commence eunco l'atra sonneie..

Pierette : Deh...crapot! Vos les passo me le voye..

Jussef :: Deh resta tranqui don...selorie..

Arnold : **(Levve la tita)** Et predza pi todzen que te me direndze la partia...

Maurice : Ma cenque l'ei fiade pi inque.. ? L'est pas eun post pe vieun se droghi cè, don.. !!!! Et adon pensade meique de vos se fouri !!!

Pierette : Mi Maurice.. ara isagera pas.. l'an 8 ans dessus la tita...fran se droghi ara..

Maurice : Ouè.. l'an 8 et peucon dza de « pastiglie ».. eitsa que stat..

Sharon : No no vouten savei you l'est lo senti oublià.. perque noutra mamma l'est su se mari y tsappaleun ..

Maurice : Ouè mi son le trei meinou de la tardocca que l'est ya se mari avoui ci reumbambeui..

Sharon : Mi deun la prisa l'a oublianno bas y Mc Donald...

Pierette : **(Ironique)** Djeique.. lo dzor di mariadzo eun l'est pas que pou pensi a tot.. accapite d'oubli queitsousa..

Maurice : **(Ironique)** Djèique.. l'a oubli le meinou.. comme oubli la cllia di mitcho..

Jussef : L'a oublianno mi nos sen arrevou quand mimo...perque sen trop fort..

Pierette : ..sen a post.. ouè mi que streumen..

Arnold : Et tsertsade de pas feie tan le feun et de no se deie you l'est lo senti..**(Pouse la play station et terie foua eun couti)** peatro vos crevven le roe de la machina don...

Maurice : Me n'i renque lo tratteur.. et se t'i bon a crevvi çalle .. te payo eun marsala a l'ou.. giovinot...

Jussef : Fiade pas tan le feun avoui no.. perque sen pi nos que no cherden la meison de repou you vos se beutti, don ?..

Maurice : Deh.. te la ballio me la meison de repou... Ya de cè.. si cou n' prou don.... ma te pensa !! Vos le passo me le voye...

(Maurice pren la tserrite et va envers le meinou, que scappon)

Arnold : Ya de pi inque..

Jussef : Sharon.. Arnold.. allen...

Sharon : **(Vei l'icreita que moutre lo senti)** Uè raga... ya de ce.. eitsade l'est marquou li.. que lo senti l'est de ci couti.. allen..

(Le meinou chorton a galop. Maurice et Pierette reston rito et sensa paolle)

Maurice : Arnold Swartzneger et Sharon Stone... **(Ironique)** La tardocca quand l'a cherdei le nom aveitsave gneunca tan la télévijon deh.... Te te ren contcho you no allen fenei.. Me dimando se ço l'est la relevva cenque nos atten de cè an per de s-an..

Pierette : Ouè.. Maurice.. deio te balli reison...

Maurice : Me, seuncéamente, pe voue, n'i prou veui n'en de mat et de matas..de plandron et tabeusse.. de sonnou et de rose.. que n'i eun digou que te dio pas.. Se ço l'est lo mondo di dzor de voue.. sen a post..

(Pierette et Maurice vignon devan)

Pierette : Eun mondo fi de mat et de compleucachon, de procédeueu et de burocratie, de fasetou et d'apparence...you tot semble vieun pi diffecilo malgre lo progres et la societou que, nos se dion, vat eun devan.. Eun mondo you tcheut le dzor no se eumpouson de rille.. et pi de rille n'at, soven foule et sensa sens, et pi s'oublion le preuncipo pi élémentéro que derian itre a la base de noutra sociétou...et que le viou nos an moutrou..

L'est lo mondo di dzor de voue, bien cheur ..et que vat eun devan, dion..mi qu'a dzeudji di dzi l'est pas a mimo de rendre lo mondo conten et satisfi.. et you tcheut regretton lo ten passou.., s'appeillon a queitsousa que l'an pas..ou dimandon de bague eumpoussible en pensen de possei avei todzor de pi...et eun pensen pay de possei itre heureux..

Et adon yet da se dimandi you l'est eun tren d'alli ci mondo.. you son tcheut a la restertse d'eun conseil ou d'eun idzo, que soven son de meacclio.. eun'oublion que deun la via se pou pas imagini que quatcheun d'atro siche todzor prest a resoudre le noutre problème.. le noutre aspirachon.. et le noutro caprice.. Perquè son soven renque la force et la volontou que n'en deudeun que pouon feie realisi le noutro sondzo..

Maurice : Si fran stoufie di dzi que n'en a l'entor..et de tot cenque n'en veui voue.. Eun senten lo mondo comme vequei...eun acouten cenque pense.. Eun veyen comme se compourte.. et eun aveitsen amodo tot cen que l'ei vionde a l'entor...

Pierette : Te compreigno Maurice..et te sa cenque te dio? Planten tot li..fremmen la bouteucca.. fremmen tot pe quaque dzor et parten eunco no...

Maurice : Mi comme parten eunco nos... ?

Pierette : Parten eunco no su pe lo senti oubliia....

Maurice : Su pe lo senti?.. Cenque te deui ?

Pierette : L'est vieun me eun devan euna baga.. L'est vieun me eun devan eunco a me d'alli euncontri la Sente Vièrge...de tchertchi la signa presence.. de predji avoui lleu di nouvro sondzo.. de tot cenque deun la via nos se manque..et de tot cenque l'amerian avei...

Maurice: Ouè.. mi pe cenque l'ei dimandi Pierette...?

Pierette : Maurice, voui alli dimandi a la Sente Vièrge de nos se feie aveitchi tot cenque n'en la fourteua d'avei..pitout de vire cenque no se manque.. De nos balli la possibilitou d'appréci la bague eumportante de la via que tcheut le dzor no sen soven pas bon a appréci, avoui le pia bien plantou pe tera, sensa trop de s-illujon et de promesse facile...pitou de nos pedre soven pe de petchoude bague de ren.. Voui alli l'ei dimandi de nos se feie vire tot cenque n'en dza.. ren de pi et ren de difeen de cen que la via nos a ballia.. ren de pi et ren de difeen de cen que n'en meueutou... de cen que n'en, soven feunque avoui de grou sacrificho, otieun.. Ren de pi.. et ren de difeen de tot cen que n'en la chance d'avei.. et que l'est tot cen que baste.. y fond...pe itre conten..

Feun